

आकाशवाणी जयपुर-अजमेर
प्रादेशिक समाचार

- रक्षामंत्री राजनाथ सिंह ऑपरेशन सिन्दूर ने आतंकवाद रे खिलाफ भारत की करड़ी नीति अर असरदार कार्यवाही बतायो ।
- जल जीवन मिशन की मियाद साल 2028 ताई बधायी ज्यी— हर घर जल रा तैत गांवांई हलकां रा साढे बारह करोड़ घरां मांय नळ रे जरिये पाणी पूगायी ज्यो ।
- राज्य मांय चौमासा की चोखी बिरखा—प्रदेश रा ऊगणी अर लंकाऊ—ऊगणी हलकां मांय केई ठौड़ां भारी बारिश की चेतावनी ।
- प्रदेश मांय सार्वजनिक सेवा की गाड़ियां की रियल टाइम निगरानी अर मुसाफिरां की हिफाजत तैय करण सारू व्हीकल लोकेशन ट्रैकिंग सिस्टम सरू करी ज्यो ।
- दिव्या देशमुख फीडे महिला शतरंज विश्व प्रतियोगिता जीतण वाली भारत की पहली खिलाड़ी बणी ।

भारत मांय आतंक फैलावण वालां रा पाकिस्तान मांय ठिकाणां माथे कार्रवाई सारू चलायी ज्यो ऑपरेशन सिंदूर रा बारा मांय आज लोकसभा मांय खास चर्चा व्हे रही है । रक्षा मंत्री राजनाथ सिंह जम्मू—कश्मीर रा पहलगाम मांय करी ज्यो आतंकी हमला पादे करी ज्यो ई कार्रवाई ने भारत मजबूत, कामयाब अर निर्णायक फौजी कार्रवाई बतायी है । चर्चा की सरुआत करता थकां वे कह्यो के ऑपरेशन सिंदूर देश की संप्रभुता, भारत की ओळखाण, जनता रा प्रति सरकार की जिम्मेदारी अर आतंकवाद रे खिलाफ भारत की करड़ी नीति रो असरदार अर निर्णायक दरसाव हो ।

रक्षामंत्री कह्यो के पाकिस्तान की शह ऊं पहलगाम मांय करी ज्यो आतंकवादी हमलां रे कारण रिश्तेदारां ने गमावण वाला निर्दोष पिरवारां ने न्याय दिरावण सारू ऑपरेशन सिंदूर चलायी ज्यो हो । श्री सिंह कह्यो के भारतीय वायु सेना कानी ऊं करी ज्यो मोटा हमलां, थलसेना की ओर ऊं करी ज्यो करड़ी जवाबी कार्रवाई अर नौसैना कानी ऊं हमलां रो डर पाकिस्तान ने घुटना टेक देवण माथे मजबूर कर दीनो । वे कह्यो के प्रधानमंत्री नरेन्द्र मोदी अर म्हाणी सरकार रो रुख बिल्कुल साफ है के आतंकवाद अर बातचीत एके सागे नी चाल सके है । ई बीचे फौज ऊं मिली जाणकारी रे मुजब ई साल 22 अप्रैल ने कश्मीर मांय पहलगाम की बैसरन घाटी मांय व्हा आतंकी हमला मांय शामिल तीन आतंकवादियां ने

श्रीनगर रा हरवान कने लिडवास हलका मांय फौज कानी ऊं चलायी ज्या ऑपरेशन महादेव रा तैत मार दिया ज्या है। हलका मांय तलाशी अभियान चलायो जा रह्यो है।

केन्द्र सरकार री ओर ऊं साल 2019 मांय चलायी ज्या जल जीवन मिशन री मियाद साल 2028 ताई बधा दीरीजी है। जल शक्ति राज्य मंत्री वी. सोमन्ना आज राज्यसभा मांय आ जाणकारी दीनी।

वे बतायो के मिशन री सुरूआत री बगत देश रा करीब 17 फीसदी घरां मांय नळ रे जरिये पाणी पूगायो जा रह्यो हो, जो अब 81 फीसदी ताई बध ग्यो है। श्री सोमन्ना बतायो के जे.जे.एम. रा तैत देश रा गांवाई हलकां मांय 19 करोड़ 36 लाख पिरवारां मांय ऊं हाल ताई करीब साढे 12 करोड़ पिरवारां ताई नळ रे जरिये पाणी पूगायो जा रह्यो है। ई अभियान रो मकसद देश रा हर गांव रा हर पिरवार ताई नळ रे जरिये पाणी पूगावणो है।

मुख्यमंत्री भजन लाल शर्मा आवता बगत री जरूरतां ने ध्यान राखता थकां कार्य योजना बणावण माथे जोर दीनो है। श्री शर्मा आज जयपुर मांय राखी ज्या राज्य स्तर रा सम्पूर्णता अभियान सम्मान समारोह मांय बोल रह्या हा। वे कह्यो के सगळां ने सागे ले र विकास करण सारू सोच सागे योजना बणा र काम करणो जरूरी है। श्री शर्मा योजनावां ने बेहतर तरीका ऊं लागू करण सारू न्यारा—न्यारा महकमां रा तालमेल माथे ई जोर दीनो।

मुख्यमंत्री कह्यो के प्रदेश रा समावेशी विकास सारू विकसित राजस्थान 2047 विज़न डॉक्यूमेंट बणायो जा रह्यो है। इण मांय आवता बगत री जरूरतां रा अंदाज रे मुताबिक लम्बी मियाद री योजनावां शामिल करी जा रही है। श्री शर्मा कह्यो के गुरु गोलवलकर आकांक्षी ब्लॉक विकास योजना रा तैत नुवा कामां ने बधावो दे र अन्त्योदय रो संकल्प पूरो कर्यो जा रह्यो है। नीति आयोग री ओर ऊं तैय करी ज्या 6 संकेतकां मांय बेहतर काम रा आधार ऊं करौली ज़िलो प्रदेश मांय अव्वल रह्यो। कार्यक्रम मांय न्यारा—न्यारा संकेतकां मांय सौ फीसदी उपलब्धि हासिल करण वाळा ब्लॉकां रो ई मान करी ज्यो। मुख्यमंत्री आज वां रा रहवास माथे जन—सुणवाई कीनी। ई दौरान वे अहलकारां ने जनता रा समस्यावां माथे खास ध्यान देता थकां टेमसर निपटारा रा हुकम दीना।

प्रदेश मांय चलायी जा रही सार्वजनिक सेवा री बसां री ठौड़ री तुरत जाणकारी करण अर मुसाफिरा री हिफाजत तैय करण सारू व्हीकल लोकेशन ट्रेकिंग सिस्टम सारू करी ज्यो है। उपमुख्यमंत्री प्रेमचन्द बैरवा आज जयपुर में वी.एल.टी.डी. कमाण्ड सेन्टर रो उद्घाटन कीनो। पेश है एक रपट—

राज्य मांय चौमासा री चोखी बिरखा व्हे रही है। मौसम महकमो आज कोटा, बारां, सवाईमाधोपुर, करौली अर भरतपुर मांय भारी बारिश रो रेड अलर्ट जारी कीनो है। मौसम केन्द्र जयपुर रा निदेशक राधेश्याम शर्मा बतायो के जयपुर, अजमेर अर जोधपुर संभाग मांय ई कठे-कठे भारी बारिश रा आसार है।

लारला 24 घंटां मांय राज्य रा ऊंगणी हलका मांय चोखो मेह बरस्यो। सब ऊं बत्ती 24 सेन्टीमीटर बिरखा कोटा ज़िला रा रामगंजमंडी मांय व्ही। म्हाणा कोटा खबरनवीस बतायो के पाणी भर जावण रे कारण केई गांव खास गेलां ऊं कट गया है।

झालावाड़, टोंक, भीलवाड़ा, बारां, प्रतापगढ़ अर चित्तौड़गढ़ ज़िलां रा केई हलकां मांय व्ही भारी बारिश ऊं जिन्दगी माथे असर पड़्यो। धौलपुर मांय चम्बल नदी मांय पाणी रो लेवल खतरा रा निशाण 130 मीटर ने पार कर ग्यो है। प्रदेश रा तीन चौथाई बंधा-तळाव भर गया है। छोटा-मोटा 693 बंधां मांय ऊं 226 बंधा पूरा भर गया है, जद के 332 थोड़ा-घणा भर्या है। राज्य मांय ई चौमासा मांय हाल ताई औसत ऊं 89 फीसदी बत्ती बिरखा व्हे चुकी है।

आज वर्ल्ड हेपेटाइटिस-डे है। लिवर री बीमारियां रा बारा मांय जाग जगावण रा मकसद ऊं दुनियाभर मांय हर साल 28 जुलाई ने ओ दिन मनायो जावे है। लिवर मांय सूजन वाळी हेपेटाइटिस बीमारी ने चुपचाप मार देवण वाळी रा तौर ऊं पिछाणी जावे है। विश्व हेपेटाइटिस दिवस 2025 रो मुद्दो **लेट्स ब्रेक इट डाउन** राख्यी ज्यो है। प्रदेश मांय ई ई मौके भांत-भांत रा कार्यक्रम राख्यी ज्यो। कोटपूतली-बहरोड़, डूंगरपुर अर बांसवाड़ा मांय रैली निकाळ र ई बीमारी रा बारा मांय जाणकारी दीरीजी। डूंगरपुर मांय आज एक महीना रो खास अभियान सरू करी ज्यो। ई रा तैत ई बीमारी ऊं बचाव बाबत् टीका लगावण माथे खास ध्यान दियो जावेला। सवाईमाधोपुर मांय चिकित्सा कर्मचारियां ने हेपेटाइटिस ऊं बचाव रा टीका लगायी ज्यो। नेशनल वायरल हेपेटाइटिस कन्ट्रोल प्रोग्राम री राज्य नॉडल अधिकारी डॉ. सुनीता थाकन बतायो के टेमसर जांच अर ईलाज ऊं ई बीमारी रा गंभीर नतीजा ऊं बचाव कर्यो जा सके है।

दिव्या देशमुख फिडे महिला शतरंज होड़ जीतण वाळी भारत री पहली महिला बण गयी है। दिव्या होड़ रा फाइनल मुकाबला मांय भारत री ई ग्रेण्ड मास्टर कोनेरू हम्पी ने हरा र खिताब जीत्यो। दिव्या महज 19 साल री उम्र मांय आ उपलब्धि हासिल कर र इतिहास रच दीनो। प्रधानमंत्री नरेन्द्र मोदी दिव्या ने आ होड़ जीतण सारू बधाई दीनी है। वे कह्यो के भारत री दो बेहतरीन खिलाड़ियां बीचे व्ह्यो ओ मुकाबलो नौजवान खिलाड़ियां ने प्रेरणा देवेला।
